

## SKÝRSLA STJÓRNAR HÍN, FLUTT Á AÐALFUNDI 28. FEBRÚAR 2022

Aðalfundur fyrir starfsárið 2020 var haldinn 25. febrúar 2021 á Zoom að loknu erindi Bryndísar Marteinsdóttur: Gróður- og jarðvegsauðlindir Íslands: Ástand og nýting.

### SKIPUN STJÓRNAR

Á aðalfundinum, þann 25. febrúar 2021, rann út kjörtímabil þriggja stjórnarmanna, þeirra Hrefnu Sigurjónsdóttur, Bryndísar Marteinsdóttur og Gróa Valgerðar Ingimundardóttur. Bryndís Marteinsdóttir gaf ekki kost á sér til áframhaldandi stjórnarsetu. Hrefna og Gróa Valgerður gáfu áfram kost á sér og jafnframt gaf Guðmundur Björnsson kost á sér til stjórnarsetu.

Kosningar til stjórnar fóru þannig: Hrefna og Gróa Valgerður voru endurkjörnar og auk þeirra var Guðmundur Björnsson kosinn til stjórnar. Skoðunarmenn reikninga voru endurkjörnir, þeir Steinþór Níelsson og Sveinbjörn Egill Björnsson.

Bryndísi Marteinsdóttur, ásamt nýjum og sitjandi stjórnarmönnum var þakkað kærlega fyrir ómetanlegt framlag til félagsins en það er ekki sjálfsagt að fólk gefi tíma sinn til slíkra starfa án þess að krefjast neins í staðinn.

Stjórn var þannig skipuð að loknum aðalfundi og skipti með sér verkum:

- Ester Rut Unnsteinsdóttir, formaður,
- Hrefna Sigurjónsdóttir, varaformaður,
- Gróa Valgerður Ingimundardóttir, ritari,
- Snæbjörn Guðmundsson, gjaldkeri,
- Anna Heiða Ólafsdóttir, félagsvörður,
- Helena W. Óladóttir, fræðslustjóri,
- Guðmundur Björnsson, kynningastjóri.

Breytingar urðu á stjórn á árinu, annars vegar þegar Guðmundur Björnsson baðst undan stjórnarsetu í júlí, vegna anna. Hins vegar þegar Snæbjörn Guðmundsson hætti í stjórn af persónulegum ástæðum í nóvember. Engir varamenn eru kjörnir til stjórnar félagsins og því hefur stjórn verið skipuð fimm manns í stað sjö, að formanni meðtöldum á síðasta fjórðungi starfsársins. Formaður tók að sér hlutverk gjaldkera en hægt gekk að fá prókúru og aðgang að rafrænum skjalasvæðum vegna breyttra reglna um skilyrt samþykki allra stjórnarmanna með rafrænum skilríkjum, sem ekki allir hafa. Er þetta meðal annars ástæða þeirra tillagna að lagabreytingum sem stjórn leggur fyrir þennan fund. Rafrænt samþykki meirihluta stjórnar ætti að nægja til að breyta um prókúruhafa enda ótækt að slík mál tefjist í langan tíma eftir niðurstöður aðalfundar ár hvert.

Óhætt er að segja að verkefni síðasta stjórnarárs hafi verið ærin og krefjandi en stjórnin hefur komið miklu áleiðis, þó ekki hafi gefist mörg tækifæri til að koma saman í raunheimum vegna heimsfaraldursins.

Á árinu voru haldnir 13 reglulegir stjórnarfundir en auk þess voru haldnir nokkrir óformlegir fundir stjórnar vegna sérstakra mála eftir því sem þörf var á. Jafnframt átti stjórn og/eða formaður fundi með ritstjóra og forstöðumanni NMSÍ vegna endurskoðunar á útgáfunni, samstarfssamningi og ráðningu á nýjum ritstjóra.

## FÉLAGSMENN

Félagsmönnum fjölgaði um sjö frá fyrra ári, þar sem nýir félagar voru 23 en 11 hættu. Heildarfjöldi félagsmanna var 1069 í árslok 2021 og þar af voru fjórir heiðursfélagar, þrír ævifélagar, 1 kjörfélagi, 38 nesar og 99 fyrirtæki, stofnanir og félagasamtök. Á síðasta stjórnarári létust fimm félagar, þar af tveir heiðursfélagar:

- Fyrrum formaður félagsins og heiðursfélagi, Eyþór Einarsson grasfræðingur lést þriðjudaginn 24. nóvember 2021, 92 ára að aldri. Eyþór vann ötullega að félagsmálum og var formaður Félags íslenskra náttúrufræðinga 1960–1962, ritari Hins íslenska náttúrufræðifélags 1960–1964 og formaður þess 1964–1966 og 1976–1980.
- Fyrrum formaður félagsins og heiðursfélagi, Dr. Arnþór Garðarsson fuglafræðingur lést á nýársdag 2022, 83 ára að aldri. Árið 2010 voru birt æviágrip Arnþórs í Náttúrufræðingnum en þau voru rituð af Gísla Má Gíslasyni, Árna Einarssyni og Þóru Ellen Þórhallsdóttur.

## ÚTGÁFA

### Náttúrufræðingurinn

Á árinu komu út fjögur hefti 91. árgangs tímaritsins í tveimur blöðum. Hefti 1-2 (87 bls) kom út að vorlagi og hefti 3-4 (174 bls) í byrjun janúar 2022. Stefnt er að því að hér eftir komi seinna heftið út fyrir áramót. Höfundum og ritrýnum greina er þakkað þeirra framlag. Frá og með hefti 3-4 var aðgangur opnaður, án tafar, og má sjá greinarnar á timarit.is.

### Ritstjórn Náttúrufræðingsins

Ritstjórn Náttúrufræðingsins var sú sama og á síðasta ári :

- Droplaug Ólafsdóttir, dýrafræðingur (formaður)
- Esther Ruth Guðmundsdóttir, jarðfræðingur
- Hlynur Óskarsson, vistfræðingur
- Hrefna Sigurjónsdóttir, líffræðingur, fulltrúi stjórnar HÍN
- Sindri Gíslason, sjávarlíffræðingur
- Tómas Grétar Gunnarsson, dýravistfræðingur
- Þóroddur F. Þóroddsson, jarðfræðingur.

Ritstjórn vinnu ómetanlegt starf í þágu útgáfunnar og er þeim hér með þakkað fyrir þeirra framlag. Ritstjóri var Álfheiður Ingadóttir og var 91. árgangur sá síðasti sem hún ritstýrði.

Ritstjóri boðaði, að venju, reglulega til fundar ritstjórnar og einstakir fulltrúar lásu með ritstjóra innsendar greinar til að meta hvort þær stæðust kröfur, hvaða flokki þær tilheyrðu og einnig komu ritstjórnarfulltrúar með tillögur að ritrýnum. Ritstjórnin fékk sendar tillögur um nýja ritstjórnarstefnu frá stjórn HÍN og brást við þeim. Stefnan mun birtast á heimasíðu Náttúrufræðingsins og er enn verið að vinna verklagsreglur og leiðbeiningar samkvæmt henni, með ritstjóra.

Í lok ársins 2021 var Margrét Rósa Jochumsdóttir ráðin sem nýr ritstjóri og hóf hún störf eftir áramót.

### **Vefútgáfa Náttúrufræðingsins**

Áfram var unnið að því að koma útgáfu tímaritsins út á vef. Verkefnastyrkur hafði verið samþykktur frá Umhverfis- og auðlindaráðuneytinu í janúar 2020 að upphæð einni milljón króna. Snæbjörn Guðmundsson, þáverandi gjaldkeri HÍN, tók að sér verkstjórnina. Honum til halds og trausts var skipaður sk. vefhópur en í honum voru tveir fulltrúar ritstjórnar Náttúrufræðingsins, þau Droplaug Ólafsdóttir og Sindri Gíslason, og tveir fulltrúar úr stjórn HÍN, auk Snæbjörns, þær Gróa Valgerður Ingimundardóttir og Helena W. Óladóttir.

Framgangur verkefnisins hefur því miður ekki verið með fullnægjandi hætti og vefsíðan er enn ekki komin í birtingu. Á vordögum 2021 var ætlunin að opna síðuna með formlegum hætti og þá fyrst voru drög síðunnar kynnt stjórn og vefhóp. Þá var ljóst að hún stóðst engan veginn þær væntingar sem til hennar voru gerðar og hafði þarfagreining vefhópsins verið virt að vettugi. Engu að síður hafði styrkurinn verið greiddur hönnuði án fyrirbyggjandi samninga, verkáætlunar eða gagna sem styðja framgang verkefnisins. Sagði Snæbjörn sig í kjölfarið frá verkefninu og tók vefhópurinn alfarið við því undir stjórn Helenu.

Því miður hefur þessi töf haft þær afleiðingar að félagið hefur ekki kost á frekari styrkveitingum opinberra aðila á árinu. Óskaði Umhverfisráðuneytið eftir greinargerð um málið ellegar yrði gerð krafa um endurgreiðslu styrksins. Stjórn HÍN skilaði greinargerð í ársbyrjun sem þótti fullnægjandi af ráðuneytisins hálfu. Fékkst lokagreiðsla styrksins greidd og málinu er þar með lokið. Það er miður að töf hafi orðið á opnun vefritsins en fullur vilji er til að halda áfram verkinu og áhersla á að ljúka því hið fyrsta. Margrét Rósa Jochumsdóttir, nýráðinn ritstjóri, hefur mikla reynslu og þekkingu af slíkri útgáfu. Hún hefur gert úttekt á málinu og komið með tillögu að leið sem er bæði farsæl og hagkvæm. Vefhópurinn mun vinna áfram með Margréti að því að koma vefnum í gagnid fyrir fyrstu útgáfu þessa árgangs.

### **Starfsmaður vefútgáfunnar**

Vinnumálastofnun samþykkti að veita félaginu styrk fyrir einu stöðugildi í 2,5 mánuði sumarið 2021. Var styrkurinn liður í atvinnuátaki fyrir námsmenn og var stefnt að ráðningu nema í náttúru- og/eða fjölmiðlafræði til að vinna eldra efni Náttúrufræðingsins fyrir nýja vefsíðu. Snæbjörn, þáverandi gjaldkeri HÍN, sá um utanumhald ráðningarinnar og bauð Hilmar Malmquist viðkomandi aðstöðu í húsnæði NMSÍ á Suðurlandsbraut. Ráðinn var nemi til verksins en því miður skilaði þessi starfskraftur ekki þeim árangri sem stjórn HÍN hafði vænst.

## FRÆÐSLA OG VIÐBURÐIR

### Fræðsluerindi/hlaðvarp

Hlaðvarpið Hinir íslensku náttúrufræðingar fór í loftið á haustmánuðum 2020. Sex nýir þættir bættust við árið 2021 þar sem rætt var við náttúrufræðinga um líf þeirra og fræðastörf. Þetta eru sérlega skemmtileg viðtöl og stjórn er mjög ánægð með hvað þættirnir hafa fengið góðar viðtökur. Þættirnir eru aðgengilegir á öllum helstu hlaðvarpsveitum auk heimasíðu HÍN. Helena W. Óladóttir og Hafdís Hanna Ægisdóttir höfðu umsjón með gerð hlaðvarpsins.

### Fræðsluferðir

Boðið var upp á eina fræðsluferð, í samstarfi við Bókasafn Mosfellsbæjar. Gengið var úr Blikastaðakró, yfir göngubrú og eftir ströndinni, beint fyrir ofan árósin þar sem Korpa rennur í Leiruvoginn. Svæðið liggur á mörkum Reykjavíkur og Mosfellsbæjar og einkennist af sjávarfitjum, grýttum þangfjörum og víðáttumiklum leirum. Þarna er mikið fuglalíf á öllum árstímum.

Járngerður Grétarsdóttir, plöntuvistfræðingur hjá Náttúrufræðistofnun Íslands sagði frá því sem markvert var að sjá af gróðri og Hrefna Sigurjónsdóttir, líffræðingur og varaformaður HÍ, fjallaði um ýmis sérkenni lífvera fjörunnar (þang og smádýr) auk þess að benda á fugla í fjörunni og utan hennar. Góð þátttaka var í ferðinni og mættu um 30 manns á öllum aldri (5-80 ára). Þrátt fyrir hressilega skúr var gerður rómur að ferðinni og voru þátttakendur, sem og skipuleggjendur mjög ánægðir með daginn.

## STUÐNINGUR VIÐ ÝMIS MÁLEFNI

### Málþing

Þann 28. september var öld liðin frá láti Þorvalds Thoroddsen, hins heimspekta frumkvöðuls á sviði jarð- og náttúrufræða. Málþing var haldið honum til heiðurs í Þjóðarbókhöðunni og hans minnst með fræðandi erindum og opnun sýningar Að málþinginu stóðu: Náttúruinjasafn Íslands, Hið íslenska náttúrufræðifélag, Landsbókasafn Íslands - Háskólabókasafn, Náttúrufræðistofnun Íslands, Veðurstofu Íslands, Hið íslenska bókmenntafélag, Jarðfræðafélag Íslands, Líffræðifélag Íslands, Jöklarannsóknafélag Íslands og Vísindafélag Íslands. Undirbúningur málþingsins var í umsjá Náttúruinjasafnsins og vann Snæbjörn Guðmundsson m.a. að honum. Stjórn samþykkti að styðja við málþingið með 150 þúsund kr. framlagi.

### Hafið er okkar umhverfi - Kvennasigling 2021

Verkefnið hafði það að markmiði að vekja athygli á umhverfismálum hafsins og hvetja konur til að sigla. Um var að ræða sjálfsprottið verkefni sex íslenskra kvenna. Siglt var á 50 ft. skútu umhverfis landið í júní og júlí og bauðst konum, hvarvetna að af landinu, að taka þátt í siglingunni hluta úr leiðinni. Alls tóku 30 konur þátt og vakti verkefnið verðskuldaða athygli. Konurnar kalla sig Seiglu enda þarf seiglu til að sigla og þarf seiglu til að takast á við umhverfisáskoranir framtíðarinnar. Hópurinn stóð fyrir ráðstefnu á Ísafirði, málþingi á

Akureyri og tileinkaði sér hæglæti á Djúpavogi. Siglingin var í samstarfi við þrjú ráðuneyti, félagasamtök um siglingar og fyrirtæki í sjávarútvegi auk þess sem fjöldi annarra aðila lagði málefnið lið. Nánar má lesa um framtakið á vefsíðu þess <https://kvennasigling.weebly.com/>. Stjórn samþykkti að styðja við málþingið með 150 þúsund kr. framlagi.

## FRJÁLS FÉLAGASAMTÖK

Í febrúar 2021 var varaformaður HÍN tilnefnd til tveggja ára í 3ja manna hóp sem hefur haft það hlutverk að vera tengiliður Umhverfis- og auðlindaráðuneytisins (nú Umhverfis-, orku- og loftslagsráðuneytis) og náttúru- og umhverfisverndarsamtaka sem eiga fulltrúa í ýmsum nefndum sem ráðherra skipar. Hópurinn leitar eftir tilnefningum frá félögum. Þegar tilnefningar eru komnar, kjósa formenn félaganna á milli frambjóðandanna og hópurinn tilkynnir niðurstöðu valsins til ráðuneytisins. Hópurinn er einnig til reiðu þegar ráðuneytið þarf að koma upplýsingum áleiðis og/eða vill ræða breytingar á samstarfssamningi við félagin. Virkni félagsins í málum sem þessum er meðal þeirra atriða sem tekin eru til greina í afgreiðslu styrkumsókna félagsins til stjórnarráðsins.

Árið 2021 tók félagið þátt í eftirfarandi tilnefningum:

- 10. júní sendu tengiliðirnir tilnefningar í fagráð náttúruminjasráð. Tilnefndar voru Erla Dóra Vogler, jarðfræðingur og óperusöngkona og Hrafnhildur Hannesdóttir, jarðfræðingur og jöklafræðingur til vara.
- maí voru tilnefningar í stýrihóp vegna áætlunar um loftgæði á Íslandi 2018-2029 þau Gerður Stefánsdóttir, líffræðingur og yfirverkefnastjóri umhverfis- og auðlindamála hjá Veðurstofu Íslands og Hafþór Ingi Ragnarsson, sjötta árs læknanemi, til vara.
- 6. apríl 2021 var Helena Westhöfer Óladóttir skipuð varafulltrúi í svæðisráði vestursvæðis í Vatnajökulsþjóðgarði í stað Arnar Óskarssonar sem sagði sig frá starfinu.
- 25. febrúar 2021 var Tinna Hallgrímsdóttir skipuð í ráðgjafarhóp vegna rannsóknarverkefnis um kolefnishlutlaust Ísland árið 2040.
- 24. febrúar 2021 var Auður Önnu Magnúsdóttir framkvæmdastjóri Landverndar skipuð í nefnd um umhverfisviðurkenningu umhverfis- og auðlindaráðuneytisins, Kuðungsins.

## ÁLYKTANIR OG UMSAGNIR

Á vordögum 2021 bárust fréttir af því að landselur dræpist í stórum stíl þegar hann flæktist í netum fiskiskipa. Af því tilefni var skrifað samhljóða bréf til Guðmundar Inga Guðbrandssonar, Umhverfis- og auðlindaráðherra, og Kristjáns Þórs Júlíussonar sjávarútvegs- og landbúnaðarráðherra. Bréfið var undirritað af formanni HÍN og framkvæmdastjóra Landverndar, því fylgdi greinargerð um málið og beðið var um fund til að svara því hvernig stjórnvöld hygðust bregðast við. Greinargerðin var unninn af óformlegum faghópi félagsins um málefni spendýra. Fundurinn var aldrei haldinn.

Árið 2020 voru sett fram drög að landsáætlun um skógrækt og opið fyrir umsagnir og ályktanir í samráðsgátt stjórnvalda. Málið var síðar fjarlægt úr samráðsgáttinni og flutt á heimasíðu Skógræktarinnar sem hafði umsjón með vinnslu áætlunarinnar en verkefnið hélt áfram á þeim vettvangi. Skógræktin kallaði í kjölfarið eftir svörum við fjölda spurninga sem sendar voru til 17 samráðsaðila, þ.á.m. HÍN. Svörum átti að skila í viðtali við forsvarsmenn Skógræktarinnar en félagið fór fram á að fá að skila jafnframt skriflegu svari. Stjórn fékk til sín tvo fyrrum formenn félagsins, þær Þóru Ellen Þórhallsdóttur og Kristínu Svavarsdóttur, plöntuvistfræðinga, til að vinna svör við spurningum Skógræktarinnar í samvinnu við formann og varaformann og voru þau send í júní 2021 en Þóra Ellen fór á fundinn. Í stuttu máli voru gerðar talsvert margar athugasemdir við framlagða skógræktaráætlun. Fleiri félög, stofnanir og aðrir aðilar skiluðu sambærilegum athugasemdum og í kjölfarið hefur áhugahópur sem í eru fyrrum og núverandi starfsmenn stofnana auk annarra frjálsra félagasamtaka, t.d. Fuglavernd og Vistfræðifélagið, haldið nokkra fundi til að safna saman efni til kynningar fyrir ráðherra. Fundur með Svandísi Svavarsdóttur, ráðherra málaflokksins var svo haldinn þann 9. febrúar 2022. Samkvæmt svörum frá ráðherra mun landsáætlun um skógrækt verða endurskoðuð og málinu verður fylgt eftir af hópnum.

## **SAMSTARF VIÐ NÁTTÚRUMINJASAFNIÐ**

Útgáfa Náttúrufræðingsins hefur verið kostuð til helminga af félaginu og safninu, samkvæmt samningi sem undirritaður var árið 2014. Í kjölfarið á nýlegum breytingum á ritstjórnarstefnu og fyrirhugaðri vefútgáfu Náttúrufræðingsins var samstarf félagsins og Náttúruminjasafnsins um útgáfuna endurskoðað. Formaður fundaði með forstöðumanni NMSÍ og ritstjóra og varð að samkomulagi að samningurinn milli félagsins og safnsins frá 2014, auk ráðningarsamnings við ritstjóra, rynni út um áramót. Nokkrir aðrir fundir voru haldnir og tók Hrefna Sigurjónsdóttir, varaformaður HÍN þátt í samningaviðræðum ásamt formanni. Endurskoðun samningsins var unnin af stjórn félagsins og Hilmar J. Malmquist, forstöðumanni NMSÍ og var hann undirritaður í desember 2021. Samningurinn var í kjölfarið birtur á heimasíðu félagsins.

Í nóvember var auglýst eftir nýjum ritstjóra, sem myndi hefja störf í ársbyrjun 2022. Texti auglýsingar var samin af Hilmar J. Malmquist, og formanni og varaformanni HÍN: Alls bárust sex umsóknir um starfið og var samhljóða niðurstaða beggja aðila að ráða Margréti Rósu Jochumsdóttur sem nýjan ritstjóra Náttúrufræðingsins.

Margrét hefur meistaragraðu í hagnýtri ritstjórn og útgáfu og hefur víðtæka reynslu í útgáfu og vefumsjón auk þess sem hún stundar nú nám í umhverfis- og auðlindafræði. Mun Margrét sjá um hefðbundna útgáfu blaðsins auk þess að hafa umsjón með nýrri vefútgáfu tímaritsins. Margrét hóf störf í janúar 2022 og hefur þegar fundað með ritstjórn og fulltrúum stjórnar í vefhóp. Við bjóðum Margréti velkomna til starfa og hlökkum til samstarfsins. Álfheiði Ingadóttur, fráfarandi ritstjóra, þökkum við kærlega fyrir áratugastarf við útgáfu blaðsins.

Meðal þess sem rætt hefur verið í þessum samningaviðræðum er merking tímaritsins. Mikilvægt að hér komi fram að stjórn er einhuga um að Náttúrufræðingurinn sé Tímarit Hins íslenska náttúrufræðifélags og að því verði ekki breytt. Útgáfan hefur verið í samstarfi við ýmsa aðila í gegnum tíðina og kemur það fram framan á kápunni og að innan, fremst og aftast,

hverjir standa að útgáfunni. Stjórnarmenn finna til mikillar ábyrgðar í þessu máli, sem kjörnir fulltrúar félagsins.

## MÁLEFNI NÁTTÚRUMINJASAFNSINS

Hin mikla barátta um lausn á húsnæðisvanda Náttúruminjasafnsins hefur frá upphafi verið viðamesta málefni HÍN, ásamt því að gefa út Náttúrufræðinginn. Stjórn félagsins hefur aldrei látið sitt eftir liggja að greiða götu safnsins eftir bestu getu, eins og fram hefur komið í ársskýrslum félagsins undanfarna áratugi. Sú breyting hefur orðið að á síðasta stjórnarári hefur stjórn ekki tekið beinan þátt í eða verið upplýst um málefni safnsins með sama hætti og áður hefur verið. Er það kannski merki um að safnið sé nú í öruggri höfn og að ekki sé lengur þörf á stuðningi frá félaginu? Stjórn HÍN óskar safninu alls hins besta og hlakkar til þess að félaginu verði boðið til opnunar Náttúruhúss á Nesinu, þegar þar að kemur.

## LOKAORÐ

Eins og fram hefur komið hefur síðastliðið stjórnarár verið viðburðaríkt og krefjandi. Þrátt fyrir að lítið hafi farið fyrir hefðbundnu starfi með þátttöku félaga, annað árið í röð, hefur mjög margt áunnist eins og sagt var frá hér að framan. Vefútgáfan hefur reynst viðameiri en gert hafði verið ráð fyrir og reynt mjög á stjórnarliða. Nú hefur birt verulega til í þeim efnum og þó ekki sé hægt að opna vef Náttúrufræðingsins á þessum ársfundi, eins og áætlað var, verður útgáfa þessa árgangs (2022) gefin út bæði á prenti og á vef. Þeim tímamótum ætlum við að fagna. Sú metnaðarfulla stefna hefur verið sett að efni Náttúrufræðingsins verði opið og aðgengilegt án þess að það komi niður á gæðum eða fagmennsku. Til þess þarf að tryggja fjármagn. Fráfarandi stjórn hefur rætt nokkrar hugmyndir til að efla og styrkja félagið og verður verk nýrrar stjórnar að halda áfram þeirri vinnu. Við viljum fjölga félögum og fá samtök og stofnanir til að leggja hærra framlag til starfsins en almenn félagsgjöld. Nýr vefur Náttúrufræðingsins, með nútímalegri leið til birtingar greina og annars fræðsluefnis um málefni náttúrunnar, verður vonandi til þess að laða að fleiri aðila sem vilja styðja við slíka útgáfu. Auk þess þarf að fara yfir eignir og birgðir félagsins og meta hvað af þeim sé hægt að nýta til fjáröflunar til verkefna félagsins.

Við skynjum mikinn áhuga á starfi félagsins og þeirri stefnu sem hér hefur verið reifuð. Sú staðreynd að auðvelt hefur verið að fá fólk úr röðum félaga til að ganga í stjórn, segir okkur að við erum á réttri leið.

f.h. stjórnar

Ester Rut Unnsteinsdóttir, formaður